

Udako Euskal Unibertsitatea



UEU-KO ZUZENDARIAREN HITZEK IRUÑEKO IKASTAROEI HASIERA EMAN ZIETEN ATZO LARRAONAN

Aizpuru: «Euskalgintzan ari direnen batasuna beharrezkoa da»

■ XXVI. Udako Euskal Unibertsitateko Iruñeko ikastaroak atzo abiatu ziren, Larraona eta Iturramako ikastetxeetan. Jose Ramon Etxebarria euskal unibertsitateari buruz mintzatu zen sarreran, UEUko zuzendari Mikel Aizpuruk ikasleei ongi etorria egin ondoren.



Atzo Iruñean egin zuten aurtengo UEUko Iruñeko ikastaroen sarrera ekitaldia. UEU

Eduarne Elizondo / Iruñea

MIARRITZEKO ikastaroak bukatu ondoren, Iruñera heldu da Udako Euskal Unibertsitatea. Sarrera ekitaldiak mahai berean bildu zituen, atzo eguerdian, UEUko zuzendari Mikel Aizpuru, Nafarroako Gobernuak Hizkuntza Politikarako Zuzendaritza Nagusiko kide Juan Ramon Elorz, Eusko Jaurlaritzako Kultura sailburorde Jose Maria Agirre, eta Jose Ramon Etxebarria. Iruñeko ikastaroak irekitzat eman ondoren, arratsaldeko 16:30etan hasi ziren ikasle eta irakasleak lanean.

UEUko ekitaldi bakarrak ez badira ere, Miarritzekoekin batera, Iruñeko ikastaroak «bereiztat» jo zituen Mikel Aizpuruk inaugurazio ekitaldian, eta euren helburu nagusia «euskalgintza-ren topagune izatea» dela azpimarratu zuen. Ildo berean, azken urteetan euskararen aurka gertatu erasoan aurrean, «euskalgintzan ari diren guztien elkartasuna eta batasuna ezinbestekoa» dela nabarmendu zuen. «Euskararen kontrako erasoek denon erantzuna jaso behar dute, euskalgintza banatu ordez, indartzeko», gaineratu zuen.

Jose Ramon Etxebarria, bestalde, euskal unibertsitateaz mintzatu zen, ikastaroari hasiera eman zien atzo eguerdiko ekital-

dian. «Euskal unibertsitateari buruzko nere gogoetak plazaratu nahi ditut gaur, aldi berean, gai horren inguruko zuen gogoetak pizteko asmoz», argitu zuen Etxebarria solasaldiaren hasieran. Jose Ramon Etxebarriaren ustez, euskal unibertsitateaz mintzatzeko hasi aurretik, «euskaldunok kategoria edo unibertso izan nahi dugun» argitu beharra dago. Etxebarriaren iritziz, euskal unibertsitateak unibertso izan behar du, eta hori dela eta, berau sortzeko proiektu berria sortu beharra dago. «Ezinezkoa da euskal unibertsitatea gaur egun Euskal Herrian dauden unibertsitateeta-

tik sortzea, unibertsitate horiek kategoria bilakatu nahi baikaituzte», esan zuen UEUko kideak.

Euskal unibertsitate autonomia

Jose Ramon Etxebarriak, halaber, euskal unibertsitateak bere ustez izan beharko lituzkeen hainbat ezaugarri eta gaur egungo zenbait arazo aipatu zituen: Etxebarriaren ustez, hain zuzen ere, euskarak izan behar du euskal unibertsitateko barne harremanetarako hizkuntza bakarra; horretarako, hala ere, marko politiko berria behar da, gaur egungoa «euskaldunen autokazioan finkatuta» dagoelako. Jose Ra-

mon Etxebarriak, gainera, euskal unibertsitateak «erakunde autonomo» izan behar duela azpimarratu zuen. Egundaren arazoan artean, berriz, funtzionario sistema nabarmendu zuen Etxebarriak, «sumisioa eta integrazioa» bultzatzen dituelako.

Euskal unibertsitatea sortzeko baldintza objektibo eta subjektibok badirela uste du, bestalde, Jose Ramon Etxebarriak: «Borondate politikoa falta da, politikoez erabaki bat hartu behar dute. Euskal unibertsitatea sortzeko dagoen indar subjektiboa bideratzeko, halaber, herri ekimena sortzea beharrezkoa da».

Udako ikasleen bilgune

ATZO eguerdian UEUko inaugurazio ekitaldia egin ondoren, arratsaldeko 16:30etan Iruñeko ikastaroak abian jarri zituzten Larraona eta Iturrama ikastetxeetan; atzo hasi eta hila- ren 31an amaituko da udako euskal ikasleen bilgune den UEU Iruñean. Aurtun, hiru sail nagusitan banatu dituzte antolatutako ikastaroak UEUko arduradunek: Arteak eta komuni-

kazioa, batetik, giza eta gizarte-zientziak, bestetik, eta zientziak, hiru-garrenik.

Arte eta komunikazioa izenburuko sailaren baitan, antzerkialaritza, arkitektura, artea, bertsolaritza eta pedagogia, eta musika aztertuko dituzte UEUko ikasleek. Giza eta gizarte-zientzien alorra izanen da oparoena ikastaro kopuruari dagokionez: antropolo-

gia, ekonomia, filosofia, glotodidaktika, historia eta antropologia, hizkuntzalaritza, itzulpen-gintza, komunikazioa, kultura klasikoa, psikologia, sexologia, soziolinguistika, soziologia eta zientzia politikoak, eta zuzenbidea izanen dira ikasleek aztertuko dituzten gaiak. Zientziei eskaini sailaren baitan, azkenik, fisika, informatika, kimika, matematika,

natur zientziak eta osasunaren ingurukoak izanen dira Iruñeko Udako Euskal Unibertsitateko ikastaroak.

Oraindik kopuru zehatza aipatzea zaila bada ere, Euskal Herriko herrialdeetako 700 ikasle inguru bilduko dira aurtun Nafarroako hiriburuko Larraona eta Iturrama ikastetxeetan egiten dituzten UEUko Iruñeko ikastaroetan. X

Baztandarren Biltzarrak izugarritzko arrakasta izan zuen

■ Elizondoko orga apainduak, errota zaharrak, irabazi zuen lehen saria

Ainhua Oiarzabal / Iruñea

IGANDEAN Elizondon ospatu zuten Baztandarren Biltzarrak izugarritzko arrakasta izan zuen iazko etenaldia eta gero. Jai egunari dagokionez, oso gustura agertu dira antolatzaileak, eta Biltzarra iazko etenalditik indarberritu egin dela uste dute. Azken urteotan bezala, *Euskuarrek batzen gaitu* izan da aurtengo leloa, eta helburua, Baztandarrek biltzea, beteta gelditu da, Jexux Bailon antolatzaileetako batek dioenez.

Baztango 11 herri egin zituzten orga apainduak eguerdian irten ziren; eskualdeko lau herri soilik gelditu ziren orgarik aurkeztu gabe. Egin egunkariaren aldekoa eta Gazte Asanbladaren beste orga bat ere irten ziren desfilean. Guztira, 13 orga apaindu irten ziren eguerdian desfilean. Hiru motatako orgak izan ziren ikusgai: dotoreak, barrea eragitekoak, eta errebindikatiboak. Eta lehen motako hiru orga izan ziren sarituak. Lehen saria errota bat itxuratzen zuen Elizondoko orgak eraman zuen; bigarrena ermita batera egiten duten prozesioa itxuratzen zuen Zigako orgak lortu zuen; eta hirugarrena, Mugaireko orgak itxuratzen zuen karo-biari eman zioten.

Desfilearen ondorengo bazkarian 1.600 lagunetik gora elkartu ziren. Eta egunak freskatu zuenean, nahikoa dantza egin zuten Amaia eta Kristina trikitilariekin eta Laiotz dantza taldeekin. Baztandarrez gainera, Gipuzkoako eta Iparraldeko lagun ugari bildu zen Elizondon.

Baztandarren Biltzarrean Baztango nahiz Euskal Herriko jende ugari bildu zen arren (15.000 inguru), hori ez da izan, antolatzaileen iritziz, egunaren lorpenik garrantzitsuenak. Jendeak orgak apaintzen egin duen lan mordoa, eta, txosnan eta bazkaria zerbitzatzen aritu den jende kopurua garrantzitsuagoa da, antolatzaileen esanetan. Izan ere, orain arte jende gutxi ibiltzen zen eguna antolatzen, eta hori izan zen iaz Biltzarra ez egiteko arrazoiak, hain zuzen. Hala ere, aurtengo Biltzarrak izugarritzko arrakasta izan duen arren, datorren urteari begira lanean jarraitu behar dela uste dute antolatzaileak.

Era berean, Baztandarren Biltzarra antolatzen duen izen bereko elkarteak, elkar- tea sendotzeko eta urtean zehar ekintza gehiago antolatzeko asmoa duela adierazi digu. X